



Les enfans d'Israël trouuent leur argent en leurs sacs, & retournans en Egypte menent Benjamin avec eux.

AV retour d'Egypte les enfans d'Israël reciterent à leur pere, que comme espions ils auoient esté constituez prisonniers par le Gouverneur, deuant lequel (disoient-ils) auons maintenu, qu'estions gens paisibles, & estions douze freres d'un pere, dont le plus petit est resté avec nostre pere, & l'autre n'est plus. Mais luy ne nous voulant croire, iura que ne sortirions de là, qu'il n'en sceust la verité : & pour ce à retenu Simeon prisonnier, iusques à ce que luy ayons fait voir Benjamin. Et ces choses dites, en vuidant leurs sacs, ils trouuerent chacun son argent de quoy ils auoient acheté le bled, lié à l'entrée de leurs sacs : dont furent fort effrayez. Iacob ne veut consentir de laisser aller Benjamin, disans, que s'il luy auenoit mal, ils seroient cause de sa mort. Ruben luy offre ses deux enfans pour gage : Iuda luy remontre que s'ils ne menent Benjamin, ils ne pourront auoir de bled, ne retirer Simeon de prison, & qu'il le prend en sa charge, & promet le ramener. Or la famine s'augmentant au pais, Israël leur pere dit : Puis qu'il est necessaire, prenez l'enfant, & des fructs les plus precieux de cette terre, & portez des presens au Gouverneur, avec argent au double, & celui aussi qu'avez trouué en vos sacs.